



Il nov president dal Cussegl naziunal, Martin Candinas, è arrivà a la staziun a Mustér.

FOTOS KEYSTONE/IGIAN EHRENZELLER

Festa cun Martin Candinas a Mustér

Di da festa a Mustér: A las 14.00 è il nov elegì president dal Cussegl naziunal *Martin Candinas*, arrivà cun il tren a la staziun da Mustér. Il Sursilvan ch'è per in onn il pli aut Svizzer ha pudì giudair ses act festiv cun in cortegi ed ina festa en la baselgia claustrala da Mustér. Martin Candinas è vegni beneventà da differentas persunas da la politica. Uschia han tranter auters il cus-

seglier guvernativ *Marcus Caduff*, la cussegliera federala *Viola Amherd* ed ils presidents communalns *René Epp* da Mustér e *Patrick Schaniel* da Sumvitg beneventà Martin Candinas. Enmà il di da festa cun produziuns musicalas han las uniuns da musica sursilvanas, il chor dal gimnasi da Mustér e different solists. (fmr)



Martin Candinas e sia famiglia durant la festa en baselgia claustrala.



Il pli aut Grischun, Tarzsius Caviezel, gratulescha al pli aut Svizzer.



Cussegliera federala Viola Amherd ha surdà ina cristalla dal Vallais a Martin Candinas.



Prominenz politica a Mustér. Amez Albert Rösti, dretg Jon Pult.



Giuvn e vegl – pign e grond – ha vuliu gratular e salidar Martin Candinas.

FOTO KEYSTONE/GIAN EHFENZELLE

«Jeu sun loschs d'esser in da vus»

In til atras il vitg cun bia gliעד, musica d'emprema qualitat e plaid da reconuschientscha: Il president dil Cussegl naziunal Martin Candinas ei vegnius beneventaus la mesjamna a Mustér. Musicistas, musicists, mo era bia prominenz politica culla cussegliera federala Viola Amherd alla testa han fatg honor al pli ault Svizzer, purschend ad el in di da fiasta suenter notas.



HANS HUONDER/FMR

«Jeu sun commuentaus profunda-
 mein dalla preschientscha da tonta
 gliend e dallas stentas prestadas
 cun cor en favur da quella fiasta. Il
 til da fiasta atras il vitg da Mustér
 vegn a restar nunemblideivels.»
 Cun quels plaids ha *Martin Candi-
 nas* concludiu la mesjamna suen-
 termiezdi la part ufficala da siu ret-
 scheviment ella baselgia da s. Mar-
 tin dalla claustra da Mustér. Leu
 ein hosps dalla politica, dallas dert-
 giras, dalla Baselia e biars convi-
 schins dalla Cadi serimnai suenter
 il til pils plaids e las produziuns
 musicalas. Martin Candinas ha
 engraziu e surtut era puntuau: «Il
 pievel dalla Cadi ha tarmess mei
 silla via politica e ha adina susteniu
 mei. Per quei motiv ei quella fiasta
 buca ina mo per mei, mobein per
 nus tuts. Jeu sun loschs d'esser ina
 da vus.» Cun quella fiasta hagian
 las vischnauncas dalla Cadi mus-
 sau tgei potenzial ch'ellas hagian.

Romontschs e Sursilvans

Il til atras il vitg ei vegnius embellius
 musicalmein da 70 musicantas e
 musicants da societads da musica
 dalla Cadi. *Mario Pacchioli* ch'ei
 carschius si cun Martin Candinas a
 Rabius ha purtau il salid musical cul
 toc «L'affonza» e *Bettina Marugg
 Hermann* ed il chor dil gimnasi dal-
 la claustra, dirigius da *Clau Scherrer*
 ed accumpignaus al clavazin da
Gieri Maissen, han interpretau il toc
 «Laudate Dominum» da Wolfgang
 Amadeus Mozart. La fiasta ei vegni-
 da moderada dall'Engiadinesa
Oceana Galmarini. Insumma: Il ro-
 montsch ei staus omnipresents a
 quella fiasta ed omnipresents eis el
 quest onn els pli impurtonts uffecis.
 Cun *Marcus Caduff* ei il president
 dalla regenza grischuna in Ro-
 montsch e Sursilvan, e cun

Tarzius Caviezel ei medemamein
 il president dil Cussegl grond e pli
 ault Grischun in Romontsch cun
 ragischs sursilvans. Ed uss ei cun Martin
 Candinas era il pli ault Svizzer in Romontsch
 e Sursilvan.

«Jeu stoi pachetar mezza la cofra»

La cussegliera federala *Viola Amherd*, schefa
 dil Departament federal per defensiun, pro-
 tecziun dalla populaziun e sport, ch'ei seleg-
 rada fetg da festivar en claustra a Mustér cun
 Martin Candinas, enconuscha fetg bein il pli
 ault Svizzer. Omisdus appartegnan all'Allian-
 za dil Center e han luvrau biars onns ensemen
 el Parlament federal. «Nus havein biars inte-
 ress communabels, mo era la medema tenuta
 da respect e valurs. Tonaton differenzieschan
 duas caussas nus dus: la grondezia (dil tgerp)
 ed il fatg ch'jeu stoi pachetar mezza la cofra»,
 di Viola Amherd che ha dil reminent teniu
 l'emprema part da siu plaid per romontsch.
 Ella seigi perschuada che Martin Candinas
 vegni a menar cumpetentamein il Cussegl
 naziunal duront quei onn.

«Il resultat resplespla respect e stema»

«Il resultat che Martin Candinas ha
 contonschiu ell'elecziun sco presi-
 dent dil Cussegl naziunal muossa
 tgei stema e tgei respect ch'el gauda
 sin plaun politic naziunal», puntue-
 scha il president dalla regenza, cus-
 seglier guvernativ Marcus Caduff.
 Per in onn vegni il romontsch pur-
 taus silla pli aulta tribuna politica
 naziunala: «Jeu sun perschadius
 che bein enqual parlamentari sa em-
 pau romontsch suenter quei onn.»
 Marcus Caduff ha puntuau la varie-
 tad dil cantun Grischun, Martin
 Candinas vivi quella, ella seigi part
 da sia DNA. El ha accentuau il ro-
 montsch sco part culturala dil Gri-
 schun e dalla Svizra: «Romontsch ei
 dapli che capuns, maluns e subven-
 ziuns – schegie che subvenziuns ein
 schon impurtontas.» La fin finala ha
 il president dalla regenza era temati-



sau en ina fuorma decanta mo tonaton clara ils basegns dil Grischun: «Il viadi dalla raspada festiva da Berna atras tunnels e pass entochen Mustér muossa claramain ch'ei drova dapli tunnels sch'ins vul esser pli sperts a Berna ni naven da leu.»

«Ina honur»

66 onns suenter che Giusep Condrau – in convischin da Mustér – ei staus president dil Cussegl naziunal – suonda Martin Candinas ed il retschement pil pli ault Svizzer en sia patria ei medemamein a Mustér. «Per la vischnaunca ei quei ina gronda honur», puntuescha il president communal *René Epp*. Martin Candinas seigi ina gronda persunalitad e per las regiuns da muntogna in ver ambasador: «La politica ei sia pissiun, mo sia patria ha el buca emblidau. El sa tgei basegns che la populaziun ha.»

«Decider el senn dil schef»

Ella medem crena sco René Epp ha il president communal da Sumvitg, *Patrick Schaniel* dau: «Ti eis carschius si en ina famiglia che fa politica e gia sco giuven has ti mussau che ti has ina predilecziun per la politica, denter auter sco confundatur dalla PCD giuvna dalla Surselva. «Il sulet problem che Martin Candinas vegn ad haver igl onn vegnent ei ch'el sa buca far politica. L'auter onn eis ei numnadamein da decider davart la lescha da catscha e las secundas habitaziuns», di Patrick Schaniel. Ils parlamentararis che sappien buca co votar la finfinala en quellas duas fatschentas, sappien seolver tiel president tenor il motto: votar el senn dil schef.



Il til cun musica, il president dil Cussegl naziunal Martin Candinas, ils hosps e biars convischins dalla Cadi atras il vitg da Mustér.

FOTO HANS HUONDER

«Tonaton differenzieschan
 duas caussas nus dus:
 la grondezia (dil tgierp)
 ed il fatg ch'jeu stoi pachetar
 mezza la cofra.»

Viola Amherd, cussegliera federala